

TUTÚ DÍHNA NUU NĬ CADÚHA TÉ PÈLÚ

Té Pèlú cádũha-dé tutú sá cúu-xí cuè ñáyi sàndáá iní ñáhá xii Yá Ndiöxí

1 ¹Yúhú té Pèlú ní tendaha ñàha Xítóhó Jesucristú xicá cùu-í càháⁿ-í tnúhu-gá, te cádũha-í tutú-a sá cúu-xí nchòhó ñáyi xinchíté nuu ndècu distritú Pòntó, ndihi distritú Gàlaciá, ndihi distritú Capàdociá, ndihi distritú Àsiá, ndihi distritú Bìtiniá. ²Chi Dútú Ndiöxí ní cachí-gá sá cúu-ndó dèhe-gá ndéé cútnàhá vátá ngáva-gá ñuyíú, te Espíritú-gá ní quide-xi ndècu yĩnuhu-ndo núu-gã vitna. Te ní cachí-gá sá cúu-ndó dèhe-gá cuendá tñi-ndo nchàa tnúhu càháⁿ Xítóhó Jesucristú, ndihi cuendá nduu ndoo nduu nine iní-ndó, chi diu cuendá-áⁿ ñí xíhí Xítóhó Jesucristú. Te xicáⁿ táhù-í núu Yá Ndiöxí sá ïo na chindee chitúu ñaha-gã xii-ndo cuèi vitna te cuèi núu cuàháⁿ núu vèxi, te diu-ni-gá ná cádá te ïo váha cuu iní-ndó cùndecu-ndo.

Tnúhu ndee ìní sá ndécú ndihi ñáyi sàndáá iní ñáhá xii Yá Ndiöxí

³Te vitna chí ná càchí-ó sã ïo càhnu cuu Yá Ndiöxí Yaá cúu Tátá Xítóhó Jesucristú, chi diu-gá ïo ní cundàhú iní ñáhá-gã xii-o ñuu xíãⁿ ní quide-gá sá nchóó ñí nduu-o dàtná ìⁿ ñáyi saa vitna. Te ducaⁿ ñí quide ñaha-gã xii-o cuendá sá Xítóhó Jesucristú ní xíhí-gá te ní ndoto-gá. Te cuendá sá ñí nduu-o dàtná ìⁿ ñáyi saa, xíãⁿ ní ngúndecu ndihi-o tñũhu ndee ìní ⁴sá cùndècu ndihi-o-gá ni caa ni quíhíⁿ, chi ducaⁿ ñí cachí-gá cunduu. Te yàcáⁿ vá quíní-gá-ó ñí ìⁿ sá cuèhé sá dúhá, te ïo cudíí ìní-ó cùndecu-o ndihi-gá ni caa ni quíhíⁿ. ⁵Te sá sàndáá iní-ó Yá Ndiöxí, núu xíãⁿ coto ñaha-gã xii-o ndéé ná sàá nduu nàqueheⁿ cuendá ñáhá-gã chi ïo càhnu cuu-gá.

⁶Te xíãⁿ ïo cudíí ìní-ndó ndècu-ndo, te cuèi nándi ndòho-ndo ndecu-ndo dico sacú-ni nduu ducaⁿ ndòho-ndo. ⁷Te òré ná cádá càhnu iní-ndó yãha-ndo nchàa sá ná càda ñaha ñáyi xii-ndo, te ducaⁿ te cutnùnì sàndáá ndisa iní-ndó Yá Ndiöxí, te sá dúcáⁿ sàndáá iní-ndó Yá Ndiöxí ïo-gá váha dàcúxí dǐhúⁿ cuàáⁿ chi xíãⁿ ñá túú cùdíi-xi. Te cuèi ducaⁿ dico xito ndéé náhí-ní-güedě ñuu ndisa cùu-xi díhúⁿ cuàáⁿ. Te ducaⁿ sãtnahá-xi cùu nchohó cuendá nchaa sá ndóhó-ndó, te na sàá nduu quixi tucu Xítóhó

Jesucristú te cúñaha-gă xii-ndo: “Ío váha ní quide-ndo, te vitna ío cànhu cuu-ndo, te tàú-ndó nùcúndecu váha-ndo”, duha cúñaha-gă xii-ndo.

⁸Te vitna ío cùu iní-ndó Xítohó Jesucristú cuèi vátá quíní-gá-ndó-gă, te ducaⁿ ïo sàndáá iní-ndó-gă, te ío cùdíí iní-ndó te súúní nì ñá cùtnùní iní-ndó ñasa cunduu tnúhu cáháⁿ-ndó sã dúcáⁿ ïo cùdíí iní-ndó ⁹cuèndá sá nñ naníhí tàhú-ndó, chi ní sàndáá iní-ndó-gă.

¹⁰Te cue téé ní xóo cáháⁿ tnúhu Yá Ndiöxí ndéé sanaha nñ cachí-güedé nàcuáa cada-gá cundàhú iní ñáhá-gă xii-o vitna. Te cue téé-áⁿ ïo váha ní dácúhá-güedě nàcuáa cada Yá Ndiöxí dácácu nihnu ñaha-gă xii-o vitna.

¹¹Te Espíritú Xítohó Jesucristú ní ngúndecu ndíhi cue téé-áⁿ nñ xáhaⁿ-xi xii-güedé nàcuáa ndoho-gá, te ní xáhaⁿ tùcu-xi xii-güedé sá sätá ná yãha ndoho-gá te ío cunuu-gă ndíhi Yá Ndiöxí. Te ío ní sani iní-güedé nñu ná nduu sãá ducaⁿ càda-xi, ndíhi nchaa nándi-gá cúú sã cádá-xí. ¹²Te Yá Ndiöxí ní xáhaⁿ-gă xii-güedé sá ncháá tnúhu váha càháⁿ-güedé vá cúú-xi cuèndá méé-güedě, chi cuèndá nchoo cuè ñáyiu ndècu ñuyíú-a vitna cùu-xi. Te diu-ni tnúhu-áⁿ cúú tnúhu càháⁿ nchúhú cue téé càháⁿ tnúhu Yá Ndiöxí núú-ndó. Te Espíritú sá nñ taxi Yá Ndiöxí ndécú ndíhi-o chindee ñaha-xi xii-ndí càháⁿ-ndí tnúhu-gá. Te cue espíritú xínú cuèchi núú Yã Ndiöxí ío cuíní-xi quíní ndáá-xi nchaa nàcuáa cuáháⁿ tnúhu-áⁿ.

Yá Ndiöxí càchí-gá sá cádá-ó mèe-ni sá vãha

¹³Te sá dúcáⁿ ïo váha ní quide ñaha Yã Ndiöxí xii-ndo xíãⁿ xíní ñùhu-xi ío váha cuáha-ndo cuèndá nàcuáa cundecu-ndo te vá cání iní-ndó càda-ndo ni ìⁿ sá cuèhé sá dúhá, te ío quíndáá iní-ndó sã Yã Ndiöxí cada váha ñaha-gă nduu na quixi tucu Xítohó Jesucristú. ¹⁴Te ío tñii-ndo nchaa tnúhu càháⁿ Yã Ndiöxí, te vá cúhúⁿ-gă iní-ndó nándi sá cuèhé sá dúhá sã nñ xúhuⁿ iní-ndó cùtnàhá vátá cùndècu-gá-ndó ìchi-gá te ni vã cádá-ndó. ¹⁵Te cada-ndo mèe-ni sá vãha cundecu-ndo dàtná quidé mèe Yá Ndiöxí Yaá ní cáháⁿ ñáhá xii-o cundecu-o ndíhi-gá. ¹⁶Te càchí-gá núú tùtú-gá: “Cada-ndo mèe-ni sá vãha cundecu-ndo, chi ducaⁿ quide yúhú”, duha càchí-gá núú tùtú-gá.

¹⁷Te Yá Ndiöxí cada ndáá-gá cuèchi nchaa ñáyiu, te vá cádá cuèndá-gá cuèi náí ñáyiu cùú-yu, te nchòhó càchí-ndó sã díú Tãtá-ndó cùu-gá te ndáá, núú xíãⁿ xíní ñùhu-xi canehe-ndo sá yíñùhu núú-gă ndi nchaa nduu cundecu-ndo ñuyíú-a. ¹⁸Te diu-gá ní dácácu nihnu ñaha-gă xii-ndo ìⁿ ichi sá ñà túú nàndíhi ní sanu ichi ñaha cuè ñaní tnáhá-ndó nñ xíndecu ndéé sanaha ni cùu, te nchòhó sa nàha-ndo sá sã dúcáⁿ nñ quide ñaha Yá Ndiöxí ní dácácu nihnu ñaha-gă xii-ndo ìchi-áⁿ ñà túú ní chãhu-gá ni ìⁿ díhúⁿ cuàáⁿ, te ni ìⁿ díhúⁿ cuixíⁿ sá ndíhí nihnu ñuyíú-a cuèndá-ndó. ¹⁹Chi Xítohó Jesucristú ní quixi-gá ní sati níñí-gă, te ní xíhí-gá núú cùrúxí cuèndá

sá nchóó nàníhí tàhú-ó, te cùu-gá dàtná ìíⁿ mbéé quiti ío váha iní-xi, quiti càndoo canine. **20**Te ducaⁿ ñí ndoho Xítohó Jesucrìstú, chi ducaⁿ tnàhí ndéé tnuní ndoho-gá ndéé cútnàhá vátá ngáva-gá ñuyíú. Te ducaⁿ ñí yáha-gá cútnàhá ní quixi-gá òré vitna cùmání sǎá nduu nàa ñuyíú-a cuendá nchoo cùu-xi sá vǎha xii-o vitna. **21**Te nchòhó sa ñihí-ndó tnùhu nàcuáa ní yáha Xítohó Jesucrìstú cútnàhá ní quixi-gá ñuyíú-a, núu xǎáⁿ sàndáá iní-ndó Yǎ Ndiöxí. Te Yá Ndiöxí ní dándótó-gǎ Xítohó Jesucrìstú, te sǎtá ñí dándótó ñàha-gá te ní cachí-gá sá ìo càhnu cuu Xítohó Jesucrìstú. Te sá dúcáⁿ ñí cuu, xǎáⁿ ío sàndáá iní-ndó Yǎ Ndiöxí, te ní taxi-gá tnúhu ndee ìní ndécú ndìhi-ndo sá sàá nduu cùndecu-ndo ndìhi-gá ñí caa ñí quíhíⁿ.

22Te Espíritú Yǎ Ndiöxí ní quide-xi te ní sàndáá iní-ndó tnùhu-gá, te xǎáⁿ ní nduu ndoo ní nduu nine iní-ndó, te cùu iní tnáhá ndìsa-ndo nacúaa ndècu-ndo ichi Yá Ndiöxí, te xìni ñuhu ndisa-xi sá ìo ñí yùhu ñí iní-ndó cùu iní tnáhá-ndó ìíⁿ ìíⁿ-ndo. **23**Te nchòhó ní nduu-ndo dàtná ìíⁿ ñáyiu saa sá cuendá tnúhu Yá Ndiöxí, te tnúhu-áⁿ candeca-xi iní-ndó ñí caa ñí quíhíⁿ, te vá ííⁿ ndùu ndìhi nihnu-xi, te ñá díú cuendá ñáyiu ñuyíú-a ñí ndùu-ndo ìíⁿ ñáyiu saa chi cuendá tnúhu-gá. **24**Chi núu tütú Yǎ Ndiöxí càchí-xi:

Nchaa ñáyiu ndècu ñuyíú-a cùu-yu dàtná cùhú, chi cùhú-ǎⁿ tnaa-ñi cùdí-xi te xìhí-xi, ducaⁿ sǎtnahá-xi cùu-yu.

Te nchaa sá ndécú ndìhí-yu cùu-xi datná ìíⁿ itá cùhú-ǎⁿ, chi itá-áⁿ tnaa-ñi tucu cùdí-xi te ndàhvá-xi, ducaⁿ sǎtnahá-xi cùu nchaa sá ndécú ndìhí-yu.

25Dico tnúhu Yá Ndiöxí chi vá náá tnàhí-xi, chi duha-ñi ndècu-xi, te ñiu-ñi duha cundecu-xi ñí caa ñí quíhíⁿ.

Duha càchí-xi núu tütú-gá. Te ñiu tnúhu-áⁿ ñí dánèhé ñàhá nchùhú cue téé càháⁿ tnúhu Yá Ndiöxí xii-ndo.

2¹Te xǎáⁿ xíní ñuhu-xi dañá-ndo nchaa núu sǎ cuèhé sá dúhá, te dañá-ndo ìchi tnúhu ndehnde, te dañá-ndo vǎ dándàhú-gá-ndó mèe-ndo sá quidé vǎha-ndo, te dañá-ndo ìchi cuedú iní, te dañá-ndo nchàa tnúhu yiti. ²Te cada-ndo cuendá sá cùu-ndó dàtná cue landú yíquíⁿ vitna sadi camá, chi landú-áⁿ mee-ñi sàdi-güexi te sàhnu-güexi. Te cada iní-ndó sǎ dúcáⁿ càda-ndo chi xìni ñuhu-xi sá ìo cuhuⁿ iní-ndó dàcuaha-ndo tnúhu Yá Ndiöxí, chi xǎáⁿ cùu-xí mèe-ñi tnúhu váha, te ducaⁿ te cuita cuehnu nihnu-ndo ìchi-gá quíhíⁿ ndéé ná sàá nduu cùndecu-ndo núu ndécú-gǎ. ³Te ducaⁿ xìni ñuhu-xi cada-ndo, chi nchòhó sa ní cutnùní ndisa iní-ndó sǎ Yǎ Ndiöxí ío váha iní-gá.

Xítohó Jesucrìstú cùu-gǎ dàtná ìíⁿ yúu

⁴Te ío nanducu ñihnu-ñi-ndo Xítohó Jesucrìstú Yaá quidé nàcuáa naníhí tàhú-ó. Te ñiu-gá ní cuu-gá dàtná ìíⁿ yúu sǎ ñà túu nàndìhi sá cùu-xí ñáyiu

ñuyíu-a, chi ní dáquéé tihú ñáhă-yu xii-gá. Dico Yá Ndiöxí ní cachí-gá sá Xítohó Jesucristú cúu-gă dàtná ìⁿ yúu sã ïo-gá váha, chi ío cùnuu-gá. ⁵Te nchòhó sa ní naníhí tãhú-ndó, te ío-gá chí nándùcu nihnu Yá Ndiöxí cuèndá cuu ìⁿnuu-ndo cùndecu-ndo ndihí Espíritú-gá. Te núu ducaⁿ na càda-ndo te cuu-ndo dàtná yúu vãha dàcaa-güedé dava vehe, te cuu tucu-ndo dàtná cue dútú ñí xinu cuechi nũú Yã Ndiöxí ndéé sanaha, nàcuáa ñá túú ñã cumání-ndó nũú-gă, chi nchaa cue téé-áⁿ ñí xóo cuáha ñaha-güedě sá ñí xóo nduu táhú-gă. Te nchòhó vitna tàú-ndó càda-ndo nchaa nacuáa càháⁿ-gá, te nduu vétú iní-gá. Te ducaⁿ càda-ndo chi ndècu-ndo ndihí Xítohó Jesucristú. ⁶Te Yá Ndiöxí càchí-gá núú tütú-gá:

Yúhú taxi ndecu-í ìⁿ Yaá ñuú Sìon,
te cuu-gá dàtná ìⁿ yúu vãha sá sánútni-güedé xíquí cimièntú ìⁿ
vehe, chi yúhú ní cachí-í sá Yàá-áⁿ ïo cunuu-gă.

Te nchaa ñáyiu quèndáá iní ñáhá xii-gá vá ìⁿ ndùu ndixi cuéchi
iní-yu sá dúcáⁿ sàndáá iní ñáhă-yu xii-gá.

Duha càchí-gá núú tütú-gá. ⁷Te nchòhó ñáyiu sàndáá iní ñáhá xii Xítohó Jesucristú ío cùu iní-ndó-gă, te nchaa ñáyiu ñá túú sàndáá iní ñáhá xii-gá quídě-yu dàtná càháⁿ-xi núú tütú Yã Ndiöxí núú càchí-xi:

Yúu sã ñí dáquéé tihú cue téé dàcaa vehe, xíãⁿ cúu-xí yũú sã ïo-gá
nándihi vitna.

Duha càchí-xi núú tütú-gá. Te yúu-ãⁿ cada iní-ó sã cúu-xí Xítohó Jesucristú, chi ní dáquéé tihú ñáhá-güedě xii-gá. ⁸Te càchí tucu-xi ìngá xichi núú tütú Yã Ndiöxí:

Yúu-ãⁿ nguñenu ñáyiu te ndùá-yu.

Duha càchí-xi núú tütú-gá. Te tnúhu-áⁿ quéé-xí sã ïo quide sáá iní ñáyiu núu-gă, chi ñá túú cuiní-yu tnií-yu tnúhu càháⁿ-gá, te ducaⁿ tnàhí ndéè tnuní sá ncháá ñáyiu ñá túú cuiní tnií tnúhu càháⁿ-gá, te ío cùu sáá iní-yu núu-gă.

Ñáyiu ndècu ndihí Yá Ndiöxí

⁹Te nchoo cùu-o ñáyiu sa ní dáquéé dèⁿ ñaha Yá Ndiöxí xii-o cuèndá cundecu-o ndihí-gá, te cùu-o dútú xínú cuèchi-o núu-gă, te mee-gă cúu-gă Yaá ío cùnuu, te cùu-o ñáyiu quide ndáá xíndecu ichi-gá te cùu tucu-o ñáyiu yèndaha-gá. Te ducaⁿ ñí quide ñaha-gă xii-o cuèndá sá cũñaha-o xii nchaa ñáyiu sá ïo càhnu cuu-gá, te ío vài núu sã vãha quide-gá, te diu-gá ní quide ní dáñá-ó nchàa ichi cuehé ichi duha ndècu-o ní cuu, te ní sanu ichi ñaha-gă xii-o ìⁿ ichi váha, te vitna cùtnuní iní-ó sã ïo càhnu cuu-gá. ¹⁰Te nchoo cùu-o ñáyiu ñá túú ndècu ndihí Yá Ndiöxí ní cùu, dico vitna ní ngúndecu ndihí-o-gă, te dàvá-áⁿ vátá sáá-gá nduu càda váha ñaha-gă xii-o, dico vitna sa ní sáá nduu quide váha ñaha-gă xii-o, chi ío cùndahú iní ñáhá-gă.

Cada váha-o cùndecu-o cunu cuechi-o núú Yă Ndiöxí

11Te nchòhó ío cùu iní ñáhà-í xii-ndo, te càchí tnúhu-í xii-ndo sã nchóó cùu-o datná cue ñáyíu ndècu tnaduha ìíⁿ ñuú, te ducaⁿ sãtnahá-xi cùu-o chi tnaa-ni ndècu-o ñuyíú-a, te sáá nduu ndùu táhú-ó cùndecu-o núú ndécú Yă Ndiöxí táxí tnùní-gá, te xíăⁿ càháⁿ ndàhú-í núú-ndó sã vã cádá-ndó ñì ìíⁿ sá cuèhé sá dúhá sàni iní-ndó, chi nchaa xíăⁿ ñá túú cùu-xi sá vãha sá cúú-xí-ndó. **12**Te cada váha-ndo cùndecu-ndo núú nchàa ñáyíu ñá túú ndècu ichi Yá Ndiöxí, te cuèi na càháⁿ ñáyíu sá nchòhó nchìcúⁿ nihnu-ndo ìchi cuehé ichi duha, dico quiní-yu nchaa sá vãha quide-ndo, dico na sàá nduu dândixi túu Yá Ndiöxí iní-yu sá ñà túú quide váha-yu ndécú-yu, te dàvá-áⁿ cachí-yu sá quidé vãha-ndo ndècu-ndo, te cada càhnú-yu Yá Ndiöxí.

13Te Xítohó Jesucrístú cuení-gá sá nchòhó ío quindáá iní-ndó nchàa cue tée cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuèi mee tée cùnuu vihi-gá yíndàha ñaha xii ñáyíu. **14**Te ducaⁿ-ni quindáá iní-ndó nchàa dava-gá cue tée cùnuu, chi Yá Ndiöxí ducaⁿ ñì cachí-gá cunduu sá cuè tée-áⁿ cada ndáá-güedé nchaa cuéchi ñáyíu quide cuehé quidé dùha ndecu, te cáháⁿ váha-güedé cuendá nchaa ñáyíu xíquide váha ndècu. **15**Te Yá Ndiöxí cuení-gá sá cádá vãha-ndo cùndecu-ndo cuendá nchaa ñáyíu ío ñì dīquí-xi càháⁿ cuèhé cuendá-ndó sã ndécú-ndó ìchi Yá Ndiöxí vá ñìhí-gá-yu tnúhu cáháⁿ-yu.

16Te nchòhó, Yá Ndiöxí ñì quide-gá sá cúú-ndó ñáyíu cuu cada nacuáa véxi iní méé-xí, dico ñá díú sã dúcáⁿ ñì quide ñaha-gă xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sã cúú-ndó ñáyíu xìnu cuechi núú Yă Ndiöxí. **17**Te canehe-ndo sã yíñùhu núú nchàa ñáyíu, ndìhi núú tée cùnuu vihi yíndaha ñaha xii-yu, te cuu iní tnáhá ndì mee-ndo nacuáa ndècu-ndo ichi Yá Ndiöxí, te ío canehe-ndo sã yíñùhu núú-gă.

Nchaa nacuáa ndoho-o cùndecu-o ichi Xítohó Jesucrístú

18Te nchaa nchòhó ñáyíu xìnu cuechi canehe-ndo sã yíñùhu núú cuè patróoⁿ-ndó, te quindáá iní-ndó càda-ndo nchaa chiuⁿ tahu-güedé. Te ìíⁿ-ni càda-ndo núú cuè tée váha iní-xi, ndìhi núú cuè tée ío cuihna ìni-xi. **19**Te núu nchòhó ná càda ndee iní-ndó ndòho-ndo nchaa sá ñà túú tàú-ndó ndòho-ndo cuendá sá cuení-ndó cùndáá-ndó núú Yă Ndiöxí ñá, te ío nduu vétú iní-gá. **20**Te núu nchòhó ñì quide-ndo ìíⁿ cuéchi, te sàhni iní-ndó dândoho ñaha ñáyíu xii-ndo, ¿te ná sá vãha cùu xíăⁿ-i? Dico núu nchòhó ná cádá ndèe iní-ndó ndòho-ndo nchaa sá cádá ñàha ñáyíu xii-ndo sã cuendá sá quidé-ndó sã vãha ñà, te núu ducaⁿ na càda-ndo te cùu-xi ìíⁿ sá

văha núú Yă Ndiöxí. **21**Te Yá Ndiöxí ní cachí-gá sá cádá ndèe iní-ó ndòho-o nándi ndoho-o sã cuendá sá quidé-ó sã văha, chi ío ní ndoho Xítohó Jesucristú cuendá-ó, te ducaⁿ tàú-ó cànchicúⁿ nihnu-o càda ndee iní-ó ndòho-o nándi ndoho-o, chi ducaⁿ nĩ quide-gá. **22**Te mee-gã ñá túú quide-gá ni ìⁿ sá cuèhé sá dúhá, te ni ìⁿ tnúhu ndehnde ñà túú càháⁿ-gá. **23**Te òré ní xóo cúcuèhé ñáhá-güedě xii-gá, te ñá túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñá túú ní xăháⁿ-gã xii-güedé sá ío ná cada ñaha-gã, chi núú ndáhá Yă Ndiöxí ní xóo nachihi-gá méé-gã, ndihi nchaá sá sání ìní-güedé cada ñaha-güedě xii-gá. Te Yá Ndiöxí cúú-gã Yaá ío váha cada ndáá cuéchi nchaá ñáyiú na sàá nduu. **24**Te Xítohó Jesucristú cúú-gã Yaá ní xíhí núú cùrúxí cuendá nchaá cuéchi nchoo ñáyiú ndècu ñuyúú-a. Te ducaⁿ nĩ xíhí-gá cuendá nchoo dùuⁿ duuⁿ dañá-o nchaá ichi cuehé ichi duha, te cada ndáá-ó cùndecu-o ichi-gá. Te ní dánícuèhé ñáhá-güedě xii-gá, te sá dúcáⁿ nĩ ndoho-gá xíáⁿ ní ngúndecu váha nchoo vitna. **25**Te nchoo cùu-o datná cue mběé cue quiti ní xíta ni cùu, dico vitna ní tuha-o Xítohó Jesucristú, te Yaá-áⁿ cúú-gã dàtná ìⁿ toli xìto ñaha-gá xii-o vitna cuendá sá vă cuíta nihnu-o.

Nàcuáa tàú ñáyiú tnăndaha cadá-yu cundecú-yu

3¹Te nchaá nchòhó ñáyiú dîhí ní tñandaha ío quindáá iní-ndó yîi-ndo cuendá sá nũu ñá túú sàndáá iní-güedé tnúhu Yá Ndiöxí te quindáá iní-güedé cuendá sá ndéhé-güedě quidé ndáá-ndó ndècu-ndo, te ni ñà túú xìni ñuhu-xi cáháⁿ-ndó tnũhu-gá núú-güedě. **2**Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yîñùhu núú Yă Ndiöxí. **3**Te vá cání ìní-ndó mée-ni cunduu vii-ndo, te ndada-ndo dîquí-ndó nàcuáa tàú-xi cunduu, te vá cání ìní-ndó nándi canehe-ndo, te ni vă cání ìní-ndó cuìhnu-ndo mee-ni dóo văha sá ìo vii ndáa. **4**Chi iní-ndó xìni ñuhu-xi cunduu vii cunduu váha-xi núú Yă Ndiöxí cuèi vitna te cuèi núú cuăháⁿ núú vëxi, te cuu-ndo ñáyiú ío càhnu iní-xi, te núu ducaⁿ na càda-ndo te ío cuu váha iní Yă Ndiöxí. **5**Te ducaⁿ ìo vii ío váha ní xínduu iní nchaá ñáyiú dîhí ní xíndecu ndéé sanaha, te ñáyiú-áⁿ ìo ní sàndáá iní-yu Yá Ndiöxí te ní cudíú-yu núú-gã, te ní tñí-yu nchaá tnúhu ní cáháⁿ yîi-yu. **6**Te ducaⁿ nĩ xóo cada ndíi Sărá ní xóo quindáá iní ndíi yîi ndíi, ndíi Àbrahám, te ní cánehe ndíi dîhí-áⁿ sã yîñùhu núú yîi ndíi. Te núu nchòhó quidé văha-ndo ndècu-ndo te ñá túú yùhú-ndó nă cada ñaha tñaha ñáyiú-ndo xii-ndo, te núu ducaⁿ quide váha-ndo ndècu-ndo te quide-ndo datná ní quide ndíi Sărá.

7Te nchòhó cue tée ndècu ñadîhí-xi ío váha cuáha-ndo cuendá nàcuáa cundecu váha-ndo ndîhí-yu, te ío vii cáháⁿ ndihi-ndö-yu, chi ñáyiú-áⁿ íí-gã-yu dàcúúxí nchòo cue tée, te ducaⁿ càda-ndo chi ndi ndúú-ndó ndúu

táhú-ndó cùndecu-ndo ndìhi Yá Ndiöxí, te núu ducaⁿ na càda-ndo te òré cáháⁿ ndìhi-ndo Yă Ndiöxí te tedóho ñaha-gă xii-ndo.

Ñáyiù quède sá văha ndòhó-yu

⁸Te cächí tnúhu tucu-í xii-ndo să ïo cuu ìⁿnuu-ndo cùndecu-ndo, te cundàhú iní tnáhá-ndó ìⁿ ìⁿ-ndo, te cuu iní tnáhá tùcu-ndo nacuaá ndècu-ndo ichi Yá Ndiöxí, te cuu-ndo ñăyiù ndàhú iní-xi. ⁹Te núu ìⁿ sá ñà túú văha quède ñaha ñăyiù xii-ndo, te ñă díú-ní dùcaⁿ nanchocáva-ndo càda-ndó-yu, àdi xícuèhé ñáhă-yu xii-ndo, te vá ná danchocáva-ndo òu-ni tnúhu cuèhé, chi cacăⁿ táhú-ndó nŭú Yă Ndiöxí cuendá sá ná cádá văha ñaha-gă xií-yu, te ducaⁿ càda-ndo chi Yá Ndiöxí ní cáháⁿ ñáhá-gă xii-ndo cuendá sá cádá văha ñaha-gă xii-ndo tnàhá-ndó. ¹⁰Te núú tùtú Yă Ndiöxí cächí-xi:

Nchaa ñăyiù cuení cundecu váha ndì nchàa nduu nini cundecú-yu ñuyú-a,
xìni ñuhu-xi sá vă cáháⁿ-yu tnúhu cùtexínu, te ni vă dăcuàndehndé-yu.

¹¹Te xìni ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni să văha,
te ío ndùcú-yu năcuáa cadá-yu cundecu váha-yu ndìhi tnàha ñăyiú-yu te òu-ni ducaⁿ cànchicúⁿ nihnú-yu cadá-yu.

¹²Te Yá Ndiöxí xító-gă nchaa ñăyiù quède ndáá núú-gă te tedóho-gá nchaa tnúhu cáháⁿ-yu,
dico nchaa ñăyiù ñă túú cuení cada ndáá, ñăyiù-áⁿ ñà túú cùu váha iní-gá núŭ-yu.

Duha cächí-xi núú tùtú-gá.

¹³Te vá yòo níhí ndéé càda ñaha xii-o ìⁿ sá ñà túú văha te núu mee-ni să văha na càda-o cundecu-o. ¹⁴Àdi núu ná cúú să ná cádá ñàha ñăyiù xii-o să cuendá sá quidé văha-o ndècu-o ña, te sá dúcáⁿ ná cádá ñáhá-yu xii-o cùu-xi ìⁿ sá văha sá cúú-xí-ó nŭú Yă Ndiöxí. Te na cächí tnúhu-í xii-ndo să vă yùhú-ndö-yu, te ni vă cùndìyí-ndó cuendá nchaa sá ná càda ñáhá-yu xii-ndo. ¹⁵Te nèhe-ndo sá yíñuhu núú Xítóhó Jesucrìstú. Te ío cundecu túha-ndo dānehé-ndó ñăyiù véxi ndùcu tnúhu núú-ndó năcuáa ndùu tnúhu ndee ìní ní taxi Xítóhó Jesucrìstú ndécú ndìhi-ndo, te cuu vii cuu váha iní-ndó cáháⁿ ndìhi-ndö-yu, te cáháⁿ-ndó nŭŭ-yu mee-ni tnùhu yíñuhu nacuaá cùu váha iní Yă Ndiöxí. ¹⁶Te ío cada váha-ndo cùndecu-ndo cuendá sá vă cùndìyí-ndó, te núu ducaⁿ na càda-ndo, te nchaa ñăyiù xícuèhé ñáhá xii-ndo cuendá sá quidé văha-ndo ndècu-ndo ichi Xítóhó Jesucrìstú quendóo canúŭ-yu ndìhi nchaa tnúhu cáháⁿ-yu, chi nchòhó quidé văha-ndo ndècu-ndo. ¹⁷Te váha-gá sá ndóhó-ó cuendá sá

quidé-ó sã vãha te núu mee Yã Ndiöxí ducaⁿ cuení-gá cunduu, te ñá díú sã ndóhó-ó cuendá sá ñà túú quide-o sá vãha.

18Te Xítohó Jesucrístú ní xíhí-gá sá cuendá nchaa cuéchi nchaa nchoo ñáyiú ndècu ñuyíú-a, te ìⁿ xito-ni ducaⁿ ñí xíhí-gá te ducaⁿ te vá cùú tnàhí-gá, te mee-gã cúú-gã Yaá ñá túú tnàhí cuéchi-xi, te ducaⁿ ñí ndoho-gá cuendá nchaa cuéchi ñáyiú ndècu ñuyíú-a ñáyiú ñá túú cuení cada ndáá núú Yã Ndiöxí, te ducaⁿ ñí cuu cuendá sá núcũndecu váha-yu núú Yã Ndiöxí te núu na quèndáá iní ñáhã-yu xii-gá. Te mee-gã ní xíhí-gá dico Espíritú-gá chi ní xíndecu-ni-xi, **19**te Espíritú-gá ní sáháⁿ-xi ní cáháⁿ-xi tnúhu Yá Ndiöxí núú nchàa espíritú ñáyiú ndècu núú ùhú núú ndàhú. **20**Te ñáyiú-áⁿ cúú ñáyiú ní xíndecu ndéé sanaha cũtnàhá ní xíndecu ndíi Nöé, chi ñáyiú-áⁿ ìo ní quide sàá iní-yu núú Yã Ndiöxí. Te Yá Ndiöxí ío váha iní-gá, chi ní dácácá-gã nduu ñí xíndecuu ndíi Nöé ní cadúha ndíi bàrcú cuendá ndétú-gã ndixi cuéchi iní-yu sá ñà túú quide váha-yu ndécú-yu ni cùu. Te dàvá-áⁿ ñí ndaa ndute ñuyíú te ní cácu úná duha ná tnàhá ñáyiú, chi ní quée-yu xití bàrcú-áⁿ, te ñá túú ní cãhá-yu. **21**Te sá dúcáⁿ ñí cácu ñáyiú úná-áⁿ ñà túú ní cãhá-yu ndute ní ndaa ñuyíú dàvá-áⁿ. Te xíãⁿ quée-xí sã cuándùte ñáyiú vitna, te naníhí tàhú-yu te núu na quèndáá iní-yu tnúhu ndáá tnúhu Yá Ndiöxí. Te ñá díú sã cuándùte-o te nduu ndoo nduu nine yiqui cùnú-ó te naníhí tàhú-ó, chi xini ñuhu-xi náhmá-ó nùú Yã Ndiöxí nchaa yíca cuèchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítohó Jesucrístú ní xíhí-gá cuendá-ó te ní ndoto-gá. **22**Te Yaá-áⁿ cuàndaa-gá andiu, te ní ngóo-gá xio cùha Yá Ndiöxí, te tàxi tnuní-gá nchaa espíritú cúnùu ndìhi nchaa dava-gá cue espíritú xínú cuèchi.

Cada-o nàcuáa cuení mée Yã Ndiöxí

4 **1**Te Xítohó Jesucrístú ní ndoho-gá cútnàhá ní xíndecu-gá ñuyíú-a, te vitna nchòhó cundecu túha-ndo ndòho-ndo cuendá-gá, chi nchaa ñáyiú ndòho nándi sá ndóhó cuendá-gá dàñá-yu nchaa sá cuèhé sá dúhá. **2**Te ducaⁿ ñà túú-gã ndécũ-yu ichi cuèhé ichi duha, chi mee-ñã nàcuáa càháⁿ Yã Ndiöxí quídè-yu ndécú-yu ñuyíú-a. **3**Te nchòhó sa nàha-ndo sá ìo cuèhé nùú sã cuèhé sá dúhá ñí xóo cada-o cũtnàhá vátá cundècu-gá-ó ìchi Yá Ndiöxí, chi ní xóo cada-o nchàa sá cuèhé sá dúhá cùdí ìní nchaa ñáyiú ñá túú sàndáá iní tnúhu-gá, te dàvá-áⁿ ñí xóo cada-o nchàa núú sã cuèhé sá dúhá, te ní xóo cani cuèhé ní xóo cani duha iní-ó, te ní cuu-o cuè ñáyiú quihu, te ní xóo cundecu-o vico núú ñí xóo cada-o nchàa sá ñà túú vãha, te ní xóo níhí tnàhá-ó ndìhi nchaa tnaha quihu-o, te ní xóo chiñuhu-o nchàa sá càchí-yu cùu ndiöxí te ñá ndàá sá ndiöxí cúú nchàa xíãⁿ, te nándi-gá nchaa sá cuèhé sá dúhá ñí xóo cada-o dàvá-áⁿ. **4**Te ñáyiú-áⁿ cúñũhu-yu

vitna sá ñà túú-gă nihí tnáhá-ó ndihí-yu cada-o nchaa sá cuèhé sá dúhá quidé-yu, te xíáⁿ cãháⁿ cuèhé-yu cuendá-ó vitna. ⁵Dico sáá nduu te ñáyiu-áⁿ nãhmá-yu nchaa sá quídě-yu núú Xítohó Jesucrístú, chi diu-gá sa ndècu túha-gá sá cádá ndãá-gá cuéchi nchaa ñáyiu sa ní xíhí, ndihí cuéchi nchaa ñáyiu xĩndecu vívú. ⁶Te cue ñáyiu sa ní xíhí ní xĩndedóho tnúhu Xítohó Jesucrístú, te cuèi ní xíhí-yu dàtná xihí dava-gá ñáyiu, dico espíritú-yu chi ní nduu táhú-xi ndècu váha-xi dàtná ndécú Yă Ndiöxí.

⁷Te vitna ta cùyatni danaa Yă Ndiöxí ñuyíú-a núú xíáⁿ ío váha cuáha-ndo cuendá nàcuáa cundecu-ndo, te cáháⁿ ndihí-ndo-gă. ⁸Te xini ñuhu-xi sá ío cuu iní tnáhá-ndó ìⁿ ìⁿ-ndo, chi núú ducaⁿ na cùu iní tnáhá-ndó ìⁿ ìⁿ-ndo, te vá cání-gă iní-ndó càda cuendá-ndó nchaa sá ñà túú vãha quide ñaha ñáyiu xii-ndo, ⁹te nchòhó ñáyiu xĩndecu vehe-xi cuáha nùu-ndo vehe xii cue ñáyiu ñùhu ichi na ndetatú-yu, te ío váha cuu iní-ndó dùcaⁿ cada-ndo. ¹⁰Te Yă Ndiöxí ní taxi-gá ndí dííⁿ nùú tãhú ndécú ndihí-ndo ìⁿ ìⁿ-ndo, te nàcuáa ndùu táhú nĩ nduu táhú-ndó ìⁿ ìⁿ-ndo te ducaⁿ chĩndee tnaha-ndo, te vá dáñá ndèé-ndó càda-ndo nchaa nacuáa tàuchiuⁿ Yă Ndiöxí cada-ndo, te chĩndee ñaha-gá xii-ndo. ¹¹Te dava nchòhó ñáyiu cãháⁿ tnúhu Yă Ndiöxí núú ñáyiu, xini ñuhu-xi cáháⁿ-ndó nàcuáa ndùu tnúhu-gá núú-yu, te dava nchòhó ñáyiu quide nchaa núú chiuⁿ chĩndee tnaha ñáyiu-xi, xini ñuhu-xi cada-ndo sá Yă Ndiöxí chĩndèe ñaha-gá xii-ndo, te ducaⁿ càda-ndo nchaa núú sã vãha, chi Xítohó Jesucrístú tnáhá-gá chĩndèe ñaha-gá xii-ndo, te ducaⁿ ío cuu cãhnu Yă Ndiöxí. Te vitna tàú-ó cãháⁿ-ó sã ío cãhnu cuu Xítohó Jesucrístú, chi diu-gá cúnùu-gá nchaa nduu nchaa quíú, te ducaⁿ na cùnduu.

Ndoho tnahá-ó cùndecu-o ichi Xítohó Jesucrístú

¹²Te nchòhó ñáyiu ío cùu iní-í, vá cúnũhu-ndo sã ío ndòho-ndo ndecu-ndo ichi Xítohó Jesucrístú, chi sá dúcáⁿ ndòho-ndo-áⁿ cútnùní ndisa sá sàndáá iní-ndó-gă, te vá cání iní-ndó nã cuendá ducaⁿ ndòho-ndo. ¹³Chi da cudíí iní-ndó te núú ndòho-ndo datná ní ndoho Xítohó Jesucrístú, te ducaⁿ sũúní cùdíí iní-ndó òré ná quixi tucu-gá ñuyíú-a te dàvá-áⁿ quiní-ndó sã ío cãhnu cuu-gá. ¹⁴Te núú xĩcuèhé ñáhá ñáyiu ndècu ichi cuehé ichi duha xii-ndo cuendá sá ndécú-ndó ìchi Xítohó Jesucrístú, te xíáⁿ cúú-xí ìⁿ sá vãha sá cúú-xí-ndó nũú-gă, te ducaⁿ chi Espíritú Yă Ndiöxí sá ío cùnùu ndecu ndihí ñaha-xi xii-ndo, te nchaa ñáyiu ndècu ichi cuehé ichi duha-ãⁿ cãháⁿ cuèhé-yu cuendá Xítohó Jesucrístú, dico nchòhó cãhí-ndó sã ío cãhnu cuu-gá. ¹⁵⁻¹⁶Te núú nchòhó dándòho ñaha ñáyiu xii-ndo sã cuendá sá ndécú-ndó ìchi Xítohó Jesucrístú ñá, te vá cúú cãháⁿ núú-ndó, chi ndacáⁿ táhú-ndó nũú Yă Ndiöxí cuendá sá ndécú-ndó ìchi-gá. Te cuèi ndòho-ndo ndecu-ndo, dico ñá túú cùu-ndo ñáyiu sãhni ndíyì te ni ñà túú

cùu-ndo ñáyiú dùhu, te ni ñà túú cùu-ndo ñáyiú quide cuehé quidé dùha, te ni ñà túú cùu-ndo ñáyiú chindee tnúhu tnàha ñáyiú-xi ìⁿ sá ñà túú tàú-ndó càda-ndo.

17Te vitna sa quèsaha Yá Ndiöxí cada ndáá-gá nchaa sá quidé nchòo ñáyiú ndècu ndìhi-gá, te núu ducaⁿ te ndèé-gá cada-gá nchaa ñáyiú ñá túú sàndáá iní ñáhá xii-gá òré ná sàá nduu dùcaⁿ cada ñaha-gá xií-yu. **18**Te nchòhó xini-ndó sá ñáyiú quide váha ndècu ichi Xítóhó Jesucristú ndòho tnahá-yu ndècú-yu, dico sáá nduu te nduu táhü-yu cundecú-yu ndìhi-gá. Te núu ducaⁿ ndòho nchaa ñáyiú quide váha ña, ¿te nása-gá yáha nchaa ñáyiú ndècu ichi cuehé ichi duha na sàá nduu càda ndáá Yá Ndiöxí cuéchi-yu-i? **19**Te nchaa nchòhó ñáyiú ndòho nacuáa cuení Yá Ndiöxí xini ñuhu-xi sá vǎ dáñá ndèé-ndó càda váha-ndo cùndecu-ndo, te ío quindáá iní-ndó sá xító ñàha-gá xii-ndo. Te ñu-gá cúú-gǎ Yaá ní cadúha ñaha xii-o, te quide-gá ìⁿ sá càháⁿ-gá.

Nacuáa tàú-xi cada ñáyiú ndècu ichi Xítóhó Jesucristú

5 **1**Te yúhú càháⁿ-í dóho nchaa nchòhó cue téé yìndaha nchaa dava-gá ñáyiú ndècu ichi Xítóhó Jesucristú, chi tnàhá yúhú yìndàha-í ñáyiú ndècu ichi-gá, te sàndáá iní-í tnúhu-gá, te ní xini-í nchaa nacuáa ní ndòho-gá, te sáá nduu te tnàhá-í cunuu-ì ndìhi-gá. **2**Te ío canehe cuèndá-ndó nchaa ñáyiú ndècu ichi Yá Ndiöxí yìndàha-ndo te cada-ndo dàtná quidé cuè toli, chi cue téé-áⁿ ío váha xito-güedé mbéé-güedé. Te canehe cuèndá-ndó-yu sá cúú iní méé-ndó te ñá díú sǎ òⁿ ñáyiú cada yica ñàha xii-ndo, te ni ñà díú sǎ cuení-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuení Yá Ndiöxí cunduu. **3**Te vá cadá-ndó sǎ ío cùnuu-ndo núú-yu, chi cada-ndo mée-ni sá vǎha cuèndá ducaⁿ càncicúⁿ nihnú-yu cadá-yu tnàhá-yu. **4**Te òré ná quíxí tùcu Xítóhó Jesucristú Yaá néhé cuèndá ñáhá xii-o nchaa-o ñuyíú-a, te taxi-gá sá ío váha nduu táhú-ó, te cunuu-o ndìhi-gá ni caa ni quíhíⁿ.

5Te nchòhó ñáyiú ndècu ichi Xítóhó Jesucristú càháⁿ-í dóho-ndo sǎ ío quindáá iní-ndó cuè téé yìndaha ñaha xii-ndo nacuáa ndècu-ndo ichi-gá, te nchaa-ndo tàú-ndó quindáá iní tnàhá-ndó ìⁿ ìⁿ-ndo, chi núú tùtú Yá Ndiöxí càchí-xi ìⁿ xichi:

Nchaa ñáyiú quide cahnu mee-xi ñá túú cùu váha iní Yá Ndiöxí núú-yu,

dico nchaa ñáyiú ndàhú iní-xi te chindee ñaha-gá xií-yu.

Duha càchí-xi núú tùtú-gá. **6**Te dañà-ndo mée-ndo núú ndáhá Yá Ndiöxí, chi mee-gǎ ío cùnuu-gá. Te núu ducaⁿ na càda-ndo, te sáá nduu te cada nínu ñaha-gǎ xii-ndo. **7**Te nchaa sá yáha-ndo ndècu-ndo te nachihi-ndo ndàha Yá Ndiöxí, chi mee-gǎ xító ñàha-gá xii-ndo.

⁸Te ío váha cuáha-ndo cuèndá cundecu-ndo, te quihi iní-ndó chi sácuíhná xícá cùu-xi cuiní-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ìíⁿ quihi dééⁿ xícá ndècu sá cáxí-xí. ⁹Te ío quindáá iní-ndó Xítohó Jesucrístú, te vá dáñá-ndó mèe-ndo dandahú ñáhá sácuíhná xii-ndo càda-ndo nacuáa cuiní-xi, chi nàha-ndo sá ncháá ñáyiú ndècu ichi Xítohó Jesucrístú xíndecu nihíi ñuyíú ndóhō-yu dàtná ndóhó nchò ndecu-o ichi-gá. ¹⁰Dico sacú-ni nduu duha cundoho-o te dàtnùnì ñá túú-gá ná cumání-ó cùndecu-o núú Yă Ndiöxí, te dàvá-áⁿ vă cánì ìíⁿ canì úú iní-ó cùndecu-o ichi-gá. Te ío-gá ngúndecu ndihi-o tnùhu ndee ìní cada-o ncháa nacuáa càháⁿ-gá, te ducaⁿ càda-o chi mee Yă Ndiöxí ío chindee ñàha-gá xii-o, te diu-ni Yaá-ăⁿ ìo cùu iní ñáhá-gă xii-o, chi ní cáháⁿ ñáhá-gă xii-o cùndecu-o núú ìo váha càa ndecu-gá cundecu-o nì caa nì quíhíⁿ, te ducaⁿ nì quide-gá chi ní sándáá iní-ó Xítohó Jesucrístú. ¹¹Te ío ndacáⁿ táhú-ó nùú Yă Ndiöxí chi ío càhnu cuu-gá, te cùnuu-gá nchaa nduu nchaa quíú. Te ducaⁿ na cùnduu.

Tnúhu ndéé núú nì ndihi-ná

¹²Te té Silvanú xínì-í sá cúú-dě ìíⁿ téé quide ndáá ndécú ìchi Xítohó Jesucrístú, te diu-dé ní cáháⁿ ndàhú-í núú-dě ní tee-dé ìíⁿ úú tnúhu sá nì xáhaⁿ-í xii-dé núú tütú-a cuèndá daquixi-í ndaha-ndo, te núú tütú-a càchì tnúhu ndáá-í xii-ndo să Yă Ndiöxí ío cùu iní ñáhá-gă, te chindee ñàha-gá xii-ndo ndècu-ndo, te càchì tnúhu tucu-í xii-ndo să ìo quindáá iní-ndó să ndàá ducaⁿ quide ñàha-gá xii-ndo.

¹³Te cue ñáyiú ndècu ñuú Babiloniá, ñáyiú ndècu ichi Yá Ndiöxí, diu-ni ñáyiú ní cachí Yă Ndiöxí sá nánihí tàhú dàtná cúú nchòhó, ío quide ndee iní ñáhă-yu xii-ndo, te tnàhá té Măcú téé cùu datná ìíⁿ déhe-í quidé ndèe iní ñáhá-dě xii-ndo. ¹⁴Te ndihi tnúhu yíñùhu cada ndee iní tnáhá-ndó ìíⁿ ìíⁿ-ndo, te xìcáⁿ táhù-í núú Yă Ndiöxí sá ìo na cùndecu nahi nchaa nchohó ñáyiú ndècu ndihi Xítohó Jesucrístú. Te ducaⁿ na cùnduu. Te ío chí cádá ndèe iní-nă vitna.